



Broj: 01/5-50-1-6-24/08
Sarajevo, 26.11.2008.godine

Z A P I S N I K
24. sjednice Komisije za saobraćaj i komunikacije,
održane 26.11. 2008. godine

Sjednica je održana 26.11.2008., s početkom u 15,15 sati.

Sjednici su prisustvovali članovi Komisije: Branko Dokić, Šemsudin Mehmedović, Slavko Matić, Sadik Bahtić, Husein Nanić, Selim Bešlagić i Mehmed Suljkanović.
Odsustvovao je Savo Erić.

Iz Ministarstva komunikacija i prometa BiH sjednici su prisustvovali: Božidar Škravan, savjetnik ministra, Kojo Koprivica i Željko Knežević, pomoćnici ministra, i Marinko Šimunović, zamjenik generalnog direktora Direkcije za civilno zrakoplovstvo BiH. Sjednici je prisustvovao i sekretar Komisije za saobraćaj i komunikacije Ahmed Jalovičić.

Sjednicom je predsjedavao Branko Dokić, predsjedavajući Komisije.

Za sjednicu je predložen sljedeći

D N E V N I R E D

1. Usvajanje Zapisnika 23. sjednice Komisije;
2. Prijedlog zakona o Agenciji za razvoj informacionog društva BiH (ZARID), predlagač: Vijeće ministara BiH (druga komisijska faza);
3. Prijedlog zakona o zrakoplovstvu BiH, predlagač: Vijeće ministara BiH (prva komisijska faza);
4. Prijedlog zakona o Agenciji za pružanje usluga u zračnoj plovidbi BiH, predlagač: Vijeće ministara BiH (prva komisijska faza);
5. Prijedlog zakona o dopuni Zakona o Javnom radiotelevizijskom sistemu BiH, predlagač: Vijeće ministara BiH (prva komisijska faza);
6. Tekuća pitanja.

Dnevni red usvojen je jednoglasno.

Ad. 1. Usvajanje Zapisnika 23. sjednice Komisije

Zapisnik 23. sjednice usvojen je jednoglasno, bez primjedbi.

Ad. 2. Prijedlog zakona o Agenciji za razvoj informacionog društva BiH (ZARID), predlagač: Vijeće ministara BiH (druga komisijska faza)

Branko Dokić istakao je da je, prema dogovoru s prošle sjednice Komisije saobraćaj i komunikacije Predstavničkog doma (u daljnjem tekstu: Komisija), obavio određene konsultacije u vezi s Prijedlogom zakona o Agenciji za razvoj informacionog društva BiH (ZARID) (u daljnjem tekstu: Prijedlog zakona), te nakon toga napisao amandmane na Prijedlog zakona, koji su dostavljeni članovima Komisije. Na prvi pogled izgleda da se radi o amandmanima koji mijenjaju tekst Prijedloga zakona, ali je mišljenja da se ovim amandmanima postojeći tekst popravljaju i čini ga konzistentnim. Ukazao je na značaj amandmana koji se odnose na Vijeće Agencije za razvoj informacionog društva BiH, prije svega na izbor članova Vijeća Agencije i njegovu strukturu, kao i da se predlaže da, umjesto dva zamjenika direktora Agencije za informaciono društvo BiH (u daljnjem tekstu: Agencija), ima samo jedan, što je već slučaj u Regulatornoj agenciji za komunikacije BiH. Naglasio je da su u Prijedlogu zakona navedene i oblasti koje ne mogu biti u nadležnosti Agencije, prije svega obrazovanje, kultura i zdravstvo.

Selim Bešliagić smatra da, ako se prihvati amandman kojim se mijenja naziv Prijedloga zakona u Prijedlog zakona o Agenciji za promociju razvoja informacionog društva BiH, onda u tom slučaju nije potrebno uopće donositi zakon, pa je zatražio da mu se obrazloži ovaj amandman.

Branko Dokić odgovorio je da se Agencija bavi promocijom informacionog društva u Bosni i Hercegovini i van njenih granica i mišljenja je da je ovakav naziv Zakona adekvatniji, ali ako Komisija ne podrži ovaj amandman, on neće insistirati na njemu i obnoviti ga u plenarnoj fazi.

Božidar Škravan ukazao je da su u Ministarstvu komunikacija i prometa BiH održali sastanak na kojem su razmatrali amandmane i konstatare da je najveći broj amandmana podnesen na član 8. Prijedloga zakona, koji se odnosi na djelatnosti, kompetencije i funkcije Agencije. S obzirom na veliki broj amandmana koji im je jučer dostavljen, predlaže Komisiji da Ministarstvo u narednih nekoliko dana pokuša naći kompromis između Prijedloga zakona i uloženi amandmana, kako bi članovi Komisije prije sljedeće sjednice imali jasan stav Ministarstva o svim amandmanima.

Husein Nanić, Šemsudin Mehmedović, Slavko Matić i Mehmed Suljkanović podržali su prijedlog da se na današnjoj sjednici Komisija ne izjašnjava o amandmanima i da je potrebno da se Ministarstvo pismeno očituje o svakom amandmanu, te da se nakon toga Komisija odredi prema amandmanima i Prijedlogu zakona.

Željko Knežević smatra da ima amandmana koji mijenjaju suštinu Prijedloga zakona, ta da je Agencija nadležna i za obrazovanje, kulturu i zdravstvo.

Nakon provedene opće rasprave, Komisija je jednoglasno usvojila sljedeći zaključak:

Uzimajući u obzir da se predstavnici predlagača Zakona nisu mogli izjasniti o predloženim amandmanima, Komisija je jednoglasno zaključila da predloži Kolegiju Predstavničkog doma da se razmatranje Prijedloga zakona o Agenciji za razvoj informacionog društva BiH (ZARID) u drugom čitanju odgodi za 42. sjednicu Predstavničkog doma.

Ad. 3. Prijedlog zakona o zrakoplovstvu BiH, predlagač: Vijeće ministara BiH (prva komisijska faza)

Ad. 4. Prijedlog zakona o Agenciji za pružanje usluga u zračnoj plovidbi BiH, predlagač: Vijeće ministara BiH (prva komisijska faza)

Predsjedavajući je predložio da predstavnik Direkcije za civilno zrakoplovstvo BiH (u daljnjem tekstu: BHDC) da uvodnu riječ o Prijedlogu zakona o zrakoplovstvu BiH i Prijedlogu zakona o Agenciji za

pružanje usluga u zračnoj plovidbi BiH, da se nakon toga obavi rasprava, te da se poslije Komisija izjasni o principima i jednog i drugog prijedloga zakona.

Komisija je jednoglasno prihvatila ovaj prijedlog.

Marinko Šimunović istakao je da je postojeći Zakon o civilnom zrakoplovstvu BiH bilo potrebno usaglasiti s novim regulativama koje su proistekle iz međunarodnih sporazuma koje je Bosna i Hercegovina potpisala i ratificirala, a da s obzirom na obim izmjena nije bilo moguće izvršiti samo izmjene i dopune postojećeg zakona, pa je predloženo donošenje novog zakona. Bosna i Hercegovina obavezala se da će razdvojiti funkciju pružanja usluga u zračnoj plovidbi od regulatora u oblasti civilnog zrakoplovstva, što je i predviđeno ovim prijedlozima zakona. Prijedlogom zakona o zrakoplovstvu BiH unaprijeđena su mnoga rješenja u odnosu na važeći zakon, prije svega u pogledu sigurnosti zračnog prometa i znatno preciznijih kaznenih odredbi. Ovim prijedlogom zakona predviđeno je da je sjedište BHDCA u Banjoj Luci, a da BHDCA ima regionalne urede u Sarajevu i Mostaru.

Ukazao je da se na Prijedlogu zakona o Agenciji za pružanje usluga u zračnoj plovidbi BiH radilo dosta dugo i da je na kraju postignuta saglasnost o potrebi da se u Bosni i Hercegovini osnuje nezavisna institucija koja će moći samostalno pružati sve usluge u zračnoj plovidbi u zračnom prostoru Bosne i Hercegovine. Na ovaj način Bosna i Hercegovina bi za pružanje usluga u zračnoj plovidbi realizirala sredstva u iznosu od 30 miliona KM, a naglasio je da se trenutno dvije trećine ovih sredstava plaćaju Srbiji i Hrvatskoj za pružene usluge. Agencija za pružanje usluga u zračnoj plovidbi BiH imala bi Glavni ured u Mostaru, te centre oblasne kontrole letenja u Sarajevu i Banjoj Luci.

Branko Dokić istakao je da prijedlozi ova dva zakona predstavljaju dvije ključne stavke u provođenju Strategije upravljanja zračnim saobraćajem Bosne i Hercegovine i da usvajanjem ovih zakona Bosna i Hercegovina ispunjava uslove da bude potpuno ravnopravna članica evropskih institucija u oblasti civilnog zrakoplovstva. Pošto ima saznanja da je BHDCA dobila dobre ocjene izvršene revizija od Evropske organizacije za sigurnost zračne plovidbe – „EUROCONTROL“, mišljenja je da bi BHDCA trebalo da dostavi Komisiji informaciju o tome, kao i o samom radu BHDCA.

Nakon provedene opće rasprave, Komisija je jednoglasno podržala principe Prijedloga zakona o zrakoplovstvu BiH.

Komisija je, također jednoglasno, podržala principe Prijedloga zakona o Agenciji za pružanje usluga u zračnoj plovidbi BiH.

Ad. 5. Prijedlog zakona o dopuni Zakona o Javnom radiotelevizijskom sistemu BiH, predlagač: Vijeće ministara BiH (prva komisijska faza)

Branko Dokić pozvao je predstavnike Ministarstva komunikacija i prometa BiH da daju uvodnu riječ o Prijedlogu zakona o dopuni Zakona o Javnom radiotelevizijskom sistemu BiH (u daljnjem tekstu: Prijedlog zakona).

Kojo Koprivica istakao je da je, na inicijativu Udruženja slijepih BiH i predsjedavajućeg Vijeća ministara BiH, urađen prijedlog ovog zakona. U svim zemljama u regionu lica koja su trajno izgubila vid oslobođena su plaćanje RTV takse, bilo da je to uređeno zakonom, podzakonskim aktom ili pravilnikom javnog emitera.

Nakon provedene opće rasprave, Komisija je jednoglasno podržala principe Prijedloga zakona o dopuni Zakona o Javnom radiotelevizijskom sistemu BiH.

Komisija je u raspravi o Prijedlogu zakona usvojila i sljedeći zaključak:

Uzimajući u obzir činjenicu da se radi o zakonu manjeg stepena složenosti, Komisija, u skladu s članom 106. stav (4) Poslovnika Predstavničkog doma, predlaže Predstavničkom domu da Prijedlog zakona o dopuni Zakona o Javnom radiotelevizijskom sistemu BiH razmatra i u drugom čitanju, bez razmatranja u drugoj komisijskoj fazi.

Ad. 6. Tekuća pitanja

Kako nije bilo pitanja, predsjedavajući je zaključio sjednicu u 16,35 sati.

SEKRETAR KOMISIJE
Ahmed Jalovičić

PREDSJEDAVAJUĆI KOMISIJE
dr. Branko Dokić